

DE BERSNTOLERIN

Vour an ettla zaitn hôt s gahòp a bersntolerin pet visk jor, as a schlèchta zait galep hôt. De hôt gaòrbetet en auslònt en an spitol pet an schouber krònk.

An to ist passiar an èckstregas ding.

De krònk sai nea'mar guat stònnen ont de dektern hom se birkle nea'mer auskennt bos as mochet sai'. Asou en spitol hôt men gamiast leing au a lòrf avn tschicht, dermit as de krònk nèt en laib aninn geat, petn otnen. S ist pfèrlech gaben, men hôt se gamiast decken ont sichern. Der stòtt hôt regln augaleickt en de spitolder ont en de òltern haim iberhaupt, dermit za kempfen der VIRUS COVID -19. De hom viaber gahòp, tschlècht gaotnt, bea en de pea'r ont runt schbòch. S ist runt hòrt gaben za hèlven en de krònk, men hôt en nèt kennt der doi virus ont alura de dekter sai' nèt parogatet geben, ovar de hom tschaukt za kuriarn en spitol pet de luft direkt en de lingl. Der virus ist runt stòrch gaben ont vil sai' storm, en de gònze bèlt.

De bersntolerin ist gaben vil vort loade, bavai de kronken sai' vil gaben ont de hom runt tschlècht austschaukt. De hôt tschechen as pet de normal madesi' sai' se boltan storm. De sai' varzock gaben òlla de dekter ont de krònschbèstern aa.

An to hom se se pfunten òlla zomm za schaug bes hôt an be za kempfen de dòl kronket.

Der hauptdokter hôt se pavròkt en de òndern spitolder ont pfuntn se met de virologie dokter, bia za kuriarn de krònk van covid -19.

De hom tschechen as de miasn de krònk intubiern, as de luft geat direkt en de lingl za kempfen der virus ont an òndra moglechket ist gaben za mòchen an spritz as s pluut laitreger kimm. Ober laider belltan hom s nèt dartu'.

De berstolerin, an to darbail as se hôt kuriart de krònk hôt se kennt an mònn, as elter gaben ist, ont pet kopleziarata krònktn, pet der covid -19. De hom u'pfònk za klòffen ont s ist arauskemmen as der mònn hôt kennt s tol bou de bersntolerin ist augònnen gaben.

Er ist gòngen en tol va jung za òrbetn no en de stros as verpai ist gòngen en de derver, ont hòt kennt a baib as òrm ist gaben , pet sai'na eltern as gahòp hom de kia, ont an ettlena goas ont tschote.

En de sèlln zaitn de lait hom bea'ne gahòp za èssen ont bea'ne òrbet. De mander sai gòngen za krummern en Sudtirol ont a toal en osterreichisch-ungarisches reich. De baiber sai' plim en tol za òrbetn no en de kia, en de schof, en de goas, no en vèlt, no en bòlt, ober de hom gamiast tschbinnen za tròng envire de gònzn lait van haus.

S ist bichte verstea' der plòz as òll mentsch hòt gahòp en de sèll zait.

A bichtega rolle hom gahòp de nune, de hom tschòffen en de vatern ont en de kindern ont en de barbe, ont en de schnurn aa. Nèt òlbe ist klòr gaben za verstea' bes guat ist gòngen oder nèt. Sèll as menn mu song ist as de hom gamiast runt schbar òrbetn, trong karge af en puckl, en korb ruam ont epfel, de eart en de acker , ovar nèt lai sèll: mòchen malta za mòchen a haus, aisen, schneigl, klompern, paeldrn, stoa' ont vil ònders.

S baib hòp gahòp a bichtega rolle en dòì kontest.

De hòt gamiast aa tschbinnen en de eltern, en de krònken, en de kindern. Ober de hòt gamiast zòmm leing de probleme van lem as nèt òlbe leicht sai' gaben. Vil vòrt ist se gaben aloa' za leischn de haupt problem.

Darbail as de mander sai' vort gaben avn krummer, ist tschechen an paispil as stòrm ist a mentsch van sai'n, ont s ist kompliziart gaben za lònng s en bissn, asou s òrm baib hòt gamiast tschbinnen òlls, ont bou ist er kemmen hòt er nea'mmer pfunten o'as van sai'na lait. Men hòt s en nèt gabòrten: dòs aa hòt gamecht passiarn.

An òndern paispil ist gaben as s baib hòt gamiast pakimmern se va de vil krònketn as de lait van dorf hom gahòp. De hom praucht s gagreiser a za kemmen zunt, as a bea'ne af de vòrt en summer hom se klaup ont galeick za derrn en a truckna kommer. Abia men secht de baiber sai' bichte gaben en òlla de òrbetn.

S hòt gahòp zaruck en de zait a stòrcha erkèltung , en dòrf , as vil lait hom gamiast

stea' en pet. Asou de zunt n baiber sai gòngen za gornarn de kia ont de schof ont de goas en stòll van lait as krònk sai' gaben... ont asou envire.

De lait hom se gaholven....

Òll to dòs baib hòt en tròng en mònn gerstan kafè pet milch ont a stickl pinz za èssn. Ar hòt runt gearn gahòp, ar ist hungare gaben.

To ver to ist er gòngen baiter za kontarn en s lem as ar gamòcht hòt en sèll tol.

Ar hòt en kontart, as an to bail de òrbet, hòt s garenkt ont tschauert as s baib hòt an gariaft en haus za èssn de marenn ont asou hòt er se trikent s laib ont gabernp de hent ont de schink.

De dòl vraitschòft ist a bail ummer gòngen, ont de hom se gearn gahòp. Er hòt en gaholven za gornarn de vicher ont si hòt en kocht.

Pet de zait de òrbet va de stros ist garift gaben ont asou der monn hòt nea'mmer òrbet gahòp , er hòt gamiast gea' vort. S baib ist runt loade gaben bavai de hòt an gearn gahòp ont er aa...

De bersntolerin hòt en pfròk en beil lòn ist er gaben za òrbentn ont er hòt en tsòck bou as hòt an enga stros ont bea'ne sunn. S lont bo se augònnen ist.

No souvle jarder, en de zait van covid-19, voter ont techter hom se bider gemeicht sechen ont zòmm stea' ver en gònze lem.